



La veta dil carstgaun ei sc'ina aria ni sinfonia cun accords legreivels e meins legreivels. Ei dat muments che aulzan e tals che fan ins pensivs. Quella sinfonia ei sco in artg che sestenda dalla tgina alla patria celestiala. En quellas melodias sezuppan tuts schabetgs da nossa veta mundana: legria, tristeza, buontad, bunas ovras, igl odi, la carezia, il segidar, il parter, nossa stenta e nies pitir. Tut quellas vertids ni vezis enriheschan nus e sveglan novas speronzas e madiran il carstgaun per siu davos viadi.

Il venderdis , ils 4 da december encunter sera hael obteiu la tresta nova da sia feglia Andrea ch'il bab Marius seigi morts tut anetg e quei en la stanza da fitness a Muster. Il Marius era aunc staus il di avon enta Nalps e mussau a mi quei venderdis avon miezdi bellezia fotos dalla Val Nalps duront in bi di d'unviern. Tgi havess lu detg ch'il bien Marius banduni nus aschi spert e surura?

Marius Beer ei naschius ils 25 da schaner 1952 egl idillic uclaun da Zarcuns sco fegl da Gion Aluis Beer e Mariuschla Beer nata Monn. El ei carschius si cun treis soras pli veglias (Natalia, Helena e Claudia) en ina famiglia purila e gudiu ina biala ed emperneivla affonza. Suenter haver visitau las scolas obligatoricas a Sedrun eis el sedecidius dad ir a Tavau el hotel Strela per far igl emprendissadi da cuschinier. Sco giuven e capavel cuschinier ha Marius vuliu sescolar vinavon ed ir empau pil mund entuorn. EL ei staus dus onns a Londra sco cuschinier el Swiss- center. Arrivaus anavos en Svizra, ha el luvrau vinavon en sia professiun sco sou-chef en differents loghens: A Lausanne el hotel Metropole, a Genevra, duas sesiuns el Tessin ed ina sesiun el hotel Hold ad Arosa.

Duront quei temps ha il Marius lu aunc frequentau el militar la scola da corporal sco chef da cushima ed el era zun schazegiaus da ses superiurs ed oravontut sco super cushima per la schuldada ed jeu hai mez astgau guder sias bunas tratgas el temps dil WK ed EK.

Arrivaus en siu liug nativ ella Val Tujetsch eis el staus chef da cushima duront duas sesiuns a Milez, ina sesiun ell'ustria Cristal e 2 onns el hotel Oberalp. Il Marius cun sia dunna Prisca ein lu stai 5 onns affittaders da l'ustria Badus a Sedrun e 6 onns el hotel Krüzli. Aunc oz aud'ins da bunas reminiscenzas dils ustiers che han manischau plein engaschi e cun bia carezia il Badus ed il hotel Krüzli.

Igl onn 1985 ei il fegl Carlo naschius e treis onns suenter l'Andrea. Ils dus affons ein stai pils geniturs in schenghetg apprezziau ed els han demussau carezia e plascher per la figlialonza tras a tras. Malgrad igl engaschi en ina fatschenta gastronomia ha il bab Marius adina puspei priu temps ed ei ius per las pitgognas e mussau al Carlo ed all'Andrea biaras interessantas caussas o en la natira.

Igl onn 1979 ha il Marius lu fatg igl examen da catscha. El era in passiunau catschadur ed era fervent e bien commember da noss'unun da catschadurs. Ils onns 1988-1993 eis el staus cau tgira dall'uniun Badus. Il Marius era in catschadur da vaglia e quei da catsch'aulta e catscha bassa. Nus dus havein astgau guder ensemens biars e bials temps alla catscha bassa. Siu siemi sco era cletg ei severificaus igl onn 1982 cura ch'el ha sittau il taur capital da sedisch ella Val Bugnei. Quei ei stau gl'emprem ed insumma il pli grond taur cun ina tala corna sittaus tier nus tochen lu. Duront il temps sco ustier prendeva il Marius aunc temps per ir a laghegiar ora l'uolp e quei suenter l'ura da polizia da mesanotg. El era zun capavels sin quei sectur ed ha aschia sittau biaras uolps entras sia capientscha sur dil secuntener dallas uolps. Igl onn 2018 ha l'eleciun dalla catschadura Svizra, nua che sia feglia Andrea ei stada el final dallas treis selecziunadas e quei schizun cun las pli biaras vuschs dil publicum, plaschiu al bab Marius pir che mai.

Igl onn 1995 han il Marius e la Prisca priu la decisiun dad ir in tec in'autra via gastronomia e surpriu l'ustria da Cungieri sco gerants per aschia haver in pli emperneivel temps da lavur e quei duront siat onns. Igl onn 2001 / 02

ei il Marius vegnius elegius sco chef da cuschina ella casa da vegls sogn Vigeli. El era zun beinvesius aschibein dil persunal sco era dils attempai ed ha cuschinau bia bunas spisas duront quels onns. Pil pli han novas leschas, scriver rapports etc. caschunau al Marius problems dalla sanadad e negin plascher da cuschinar. Ina attacca dil cor ed era ina greva operaziun han tuccau sil viv ed aschia ha il Marius stuiu calar da luvrar igl onn 2013.

Igl onn 2015 ha ei denton dau ina midada surprendenta cu il Marius ei daventaus tat dalla Vlin, feglia dall'Andrea. El ha savens giu quitau da sia biadia e quei schizun dis e notgs ed aschia fatg in survetsch all'Andrea che era ustiera el hotel Posta a Rueras. Il tat Marius mava per bulius, fretgs da caglias e fageva quasi mintga di turas ed ins astga dir: El sesenteva bein ed era puspei serestabilius e plein forza ed anim da viver.

Car Marius, tes carezai cuolms vegnan a far per tei guardia perpetna e ti vegnas a restar a nus en buna memoria. Ruassa en pasch.

Per l'uniun da catschadurs Badus / Tujetsch
Norbert Vinzens



VACANZAS DA MENASCHI

Muort vacanzas ei la garasca **serrada** naven **dils 05-07 – 19-07-2021.**

Garasca Oberalp
Sedrun
Widera Helmut

Ustria Dalla Staziun

VACANZAS DA MENASCHI

Il team dall'ustria dalla staziun fa vacanzas da menaschi.

L'ustria ei serrada naven dils 25 da zercladur entochen e cun ils 15 da fenadur.

Grond engraziament ed in bi temps.

Salids amicabels da *Jaime e Maria cun team*